



MAXKAMADDA SARE EE DASTUURKA JSL

Supreme Court

المحكمة العليا

MSD/DDL/01/2024

07/03/2024

Ku: Xeer Ilaaliyaha Guud ee Qaranka JSL

HARGEYSA.**Asbaabtii Qaraarka**

Maxkamadda Dastuuriga ah ee JSL:-

Markay aragtay:- Arjiga ku taariikhaysan 04/03/2024 ujeeddadiisuna tahay “Dacwad Dastuuri ah oo ku saabsan Waafaqsanaan la’aanta Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023, Qod. 93aad, Faqraddiisa 5aad” ee uu Maxkamadda u soo gudbiyay Xeer Ilaaliyaha Guud ee Qaranka JSL, arjigaas oo nuxurkiisu ahaa in Mashruuca Sharci Qodobkiisa 93aad, Faqraddiisa 5aad uu ka hor imanayo Dastuurka JSL iyo hannaanka doorashada ee ku xusan isla Mashruuca Sharci, iyada oo asbaabaha ay dacwaddani ku dhisan tahay ay tahay sidan:

1. Qodobka 93aad, Faqraddiisa 5aad waxa uu dhigayaa “**haddii laba xisbi/urur ama in ka badan ay si walba isku leekaadaan tiro iyo boqolay ahaan oo ay ku kala bixi waayaan hanaanka ku cad Faqradda 1aad ilaa 4aad ee Qodobka, waxa u kala codeynaya Xisbiyada/Ururada isleekaaday labada Gole ee Baarlamaanka oo yeesha Fadhi wada jir ah oo uu Gudoominayo Gudoomiyaha Guurtidu**”.
2. Ugu horeyn Qodobka 93aad Faqraddiisa 5aad wuxuu si toos ah uga hor imanayaa Qodobka 38aad ee Dastuurka JSL oo ka hadlaya awoodaha Golaha Baarlamaanka iyo hawshooda fadhiyada wada jirka ah, kamana mid aha waajibaadkooda inay kala doortaan xisbi/urur midna. Labada Gole ee Baarlamaanka JSL waa golayaasha xeer dejinta Qaranka umana igmana inay qabtaan doorasho lagu kala saarayo xisbiyada/ururada

Page 1 of 6



siyaasadda ee ku tartamaya doorashada tooska ah, sidoo kalena waajibaadka iyo awoodaha Golayaasha Qaranka gaar ahaan mid kasta ugama mid aha inay doorasho qayb ka noqdaan sida ku cad Qodobada 39, 53, 61 iyo 58 ee Dastuurka.

3. Nidaamka siyaasadeed ee JSL waxa saldhig u ah dimoqraadiyad ku dhisan hanaanka xisbiyada badan, taasi oo ay shacabku awood u leeyihiin in wax doortaan iyagoo kaga qayb qaadanaya doorasho toos ah. Muwaadin kasta oo buuxiya shuruudaha doorashooyinkuna uu xaq u leeyahay in uu wax doorto ama la doorto. Haddaba Faqradda 5aad ee Qodobka 93aad ee Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023 waxay ka hor imanaysaa xuquuqda siyaasadeed ee muwaadiniinta ee ku xusan Qodobka 22aad, 9aad ee Dastuurka JSL.
4. Hannaanka doorashooyinka Qaranka JSL waa doorasho guud oo laga qabto dalka oo dhan, nidaamka codayntuna waa mid shakhsi ah oo toos ah, isla markaana qarsoodi ah oo ay muwaadiniintu si toos ah u codeeyaan (Direct Elections), balse hanaan doorasho oo labada Gole ee Baarlamaanku si dadban ugu codeeyaan xisbiyada/ururada ku tartamaya doorashada loogu soo baxayo xisbinimadu waxay ka hor imanaysaa Hannaanka Doorashooyinka Qaranka ee ay jidaynayaan Qodobka 22aad ee Dastuurka iyo Qodobada 5aad(3), 91aad(1) ee isla Mashruucan Sharci ee Doorashooyinka Guud iyo Diiwaangelinta Codbixiyeyaashu.
5. Mudanayaasha labada Gole ee Baarlamaanku waxay ka mid yihiin Xisbiyada Qaranka, sidaa daraadeed inay doorashada ka garsooraan oo ay u kala codeeyaan Xisbiyada iyo Ururada ku tartamaya doorashada tooska ah, waxay ka hor imanaysaa mabaadi'da doorashooyinka Somaliland ee ah in la hirgeliyo doorasho xor iyo xalaal ah oo loo maamulay si madax banana oo dhexdhexaad ah.

Sidaas darteed, waxaan Maxkamadda Dastuuriga ah ka codsanaynaa:

1. Inay ogolaato arjigan dacwad furasho dastuuriga ah oo xeer iyo xaqiiq waafaqsan.
2. Inay laaasho qodobka 93aad, Faqraddiisa 5aad iyo 6aad ee Wax-ka-bedelka iyo Kaabista Xeerka Guud ee



Doorashooyinka iyo Diiwaan-gelinta Codbixiyeyaasha, Xeer Lr. 91/2023, maadaama uu ka hor imanayo qodobbo dastuuri ah ee aanu kor ku soo sheegnay.

Markay deristay:- Isla markaana lafo-gurtay nuxurka dacwaddan dastuuriga ah oo ah “Qodobka 93aad, Faqaradihiisa 5aad iyo 6aad oo u dhigan sidan:

5. Haddii laba xisbi/urur ama in ka badan ay si walba isu le’ekaadaan tiro iyo boqollay ahaan oo ay ku kala bixi waayaan hannaanka ku cad faqradaha 1 illaa 4 ee qodobkan, waxa u kala codaynaya xisbiyada/ururrada is le’ekaaday labada Gole ee Baarlamaanka oo yeesha fadhi wada jir ah oo uu guddoomiyo Guddoomiyaha Guurtidu.

6. Codeynta ku xusan faqradda 6aad ee qodobkan, waxa maamulaya Komishanka Doorashooyinka iyada oo noqonaysa codayn qarsoodi ah (secret ballot).

miyay ka hor imanayaan Dastuurka JSL mise kama hor imanayaan?”

Markay deristay:- Qodobada Dastuurka JSL ee ka hadlaya xuquuqda siyaasiga ah oo xaqa doorashadu uu ka mid yahay iyo cidda xaqaasi u suganyahay waxa Maxkamadda Dastuuriga ah ee JSL u caddaatay:-

1. In Qodobka 8aad, Faqaraddiisa 3aad ee Dastuurka JSL ay si cad u sheegayso in xuquuqda siyaasiga ahi ay u gaar tahay muwaadiniinta reer Somaliland, Faqradduna waxa ay u dhigan tahay sidan: **“3. Ajaanibka dalka Somaliland sharci ku jooga waxay xeerka hortiisa ku leeyihiin xuquuq iyo waajibaad la siman tan muwaadiniinta, oo ay ka reebban tahay xuquuqda siyaasiga ah ee muwaadiniinta u gaarka ah.”**
2. Muwaadinka leh xuquuqda siyaasiga ah ee ku xusan Qodobka 8aad, Faqaraddiisa 3aad ee Dastuurka waxa lagu qeexay Qodobka 4aad, Faqaraddiisa 1aad oo u dhigan sidan: **“1. Qof kasta oo u dhashay Somaliland, kana issirran dadkii deggenaa dalka Somaliland 26kii Juun 1960kii iyo ka hor, waxa loo aqoonsanayaa muwaadin Somaliland.”**
3. Xuquuqda siyaasiga ah ee muwaadiniinta u gaarka ah oo xaqa doorashaduna ka mid yahay waa xuquuqda ku xusan Qodobka 22aad ee Dastuurka JSL oo u dhigan sidan:



1. Muwaadin kasta wuxuu xaq u leeyahay in uu ka qayb galo hawlaha siyaasadeed, dhaqaale, bulsho iyo hiddaha si waafaqsan xeerarka iyo Dastuurka.
2. Muwaadin kasta oo buuxiya shuruudaha xeerku tilmaamayo wuxuu xaq u leeyahay in la doorto, waxna uu doorto.
4. Maadaama sida kor ku xusan xuquuqda siyaasiga ah ee xaqqa doorashaduna ka mid yahay ay tahay mid Dastuurku u gaar yeelay muwaadiniinta, ma jirto meel lagu xusay in muwaadinku xaqqiisaa u wareejin karo, u igman karo ama u wakiilan karo cid ku metesha.
5. Xuquuqda siyaasiga ah ee muwaadiniintu waa mid ku dhisan dimoqraadiyad iyo hanaanka xisbiyada badan taasoo uu saldhig u yahay Qodobka 9aad ee Dastuurka JSL oo u dhigan sidan:
 1. Nidaamka siyaasadeed ee Jamhuuriyadda Somaliland waxa saldhig u ah nabad, talo-wadaag, dimuqraadiyad iyo hannaanka xisbiyada badan.
 2. Tirada xisbiyada siyaasiga ah ee dalka Jamhuuriyadda Somaliland Kama badnaan karaan saddex (3) xisbi.
 3. Iyada oo xeer gaar ahi habayn doono qaabka loo furan karo xisbi siyaasi ah, waxaa reebban in xisbi lagu dhiso gobollaysi iyo qabyaalad.
6. Nidaamka siyaasadeed ee muwaadiniintuna ay xuquuqdooda siyaasiga ah kaga qabyqaadanayaan waxa lagu maamulayaa si waafaqsan Dastuurka iyo xeerarka doorashooyinka ee ay Goleyaasha Xeer Dejinta JSL dejiyaan oo ay waajib tahay in aanay ka hor iman Dastuurka JSL, sidaas darteed, Qodobka 93aad, Faqradihiisa 5aad iyo 6aad ee Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023 ee labada Gole ee Baarlamaanka awoodda u siinaya inay xisbiyo/ururro u kala codeeyaan waxa ay xadgudub ku tahay xuquuqdii siyaasiga ahayd ee Dastuurka u gaar yeelay muwaadiniinta, sidaas darteed waxa ay ka hor imanayaan Dastuurka JSL gaar ahaan Qodobka 8aad, Faqraddiisa 3aad, iyo Qodobada 9aad, iyo 22aad ee Dastuurka JSL.



Markay deristay:- Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023 iyo qodobadiisa waxa Maxkamadda u cadaaday arrimahan soo socda:-

1. Qodobka 3aad, Faqraddiisa 2aad, Xarafka b) waxa uu si cad u dhigayaa in mabaadii'da guud ee Xeerku ku dhisanyahay ay tahay xorriyadda muwaadiniintu u leeyihiin in ay adeegsadaan xuquuqdooda siyaasiga ah si waafaqsan Dastuurka iyo xeerarka dalka JSL.
2. Qodobka 5aad ee Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023 waxa uu dhigayaa xuquuqda codbixiyaha, Faqraddiisa 5aadna waxa ay si cad u sheegaysaa in codku uu ahaado mid shakhsi ah, taasoo meesha ka saaraysa in cid kale metesho ama uu u igmado, waxaanay arrintaasi waafaqsantahay Qodobka 8aad, Faqraddiisa 3aad ee Dastuurka JSL oo sheegaysay in xuquuqda siyaasiga ahi muwaadiniinta u gaar tahay, sidaas darteed, Qodobka 93aad, Faqradihiisa 5aad iyo 6aad waxa ay ka hor imanayaan Qodobka 3aad, Faqraddiisa 2aad oo ah mabaadii'da guud ee xeerka iyo Qodobka 5aad oo dhigaya xuquuqda codbixiyaha.
3. Qodobka 12aad, Faqraddiisa 2aad ee Mahsruuc Sharci Lr. 91/2023 waxa ay dhigaysaa in Komishanka Doorashooyinka Qaranku uu madax banaani buuxda u leeyihiin dhammaan maaliyaddooda, shaqooyinkooda, shaqaalahooda iyo guud ahaan hawlaha doorashooyinka iyo diiwaangelinta codbixiyeyaasha, sidaas darteed in Baarlamaanku kaalin ku yeesho doorasho waxa ay dhaawacaysaa madaxbanaanida Komishanka Doorashooyinka Qaranka JSL iyo gudashada xilkooda iyo awoodaha xeerku siiyay ee ku xusan Qodobka 17aad ee Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/203.

Markay u caddaatay:- In awoodaha labada Gole ee Baarlamaanka ee ku xusan Qodobada 38, 53, iyo 61 ee Dastuurka JSL aanay ka mid ahayn kala saaridda xisbiyada/ururrada siyaasadda.

Markay aragtay:- Dhammaan asbaabaha kor ku xusan oo dhan iyo Qodobada 97 iyo 98 ee Dastuurka JSL iyo Qodobka 15aad ee Xeerka Nidaamka Garsoorka, Xeer Lr. 24/2003, waxa ay soo saartay qaraarkan.



Qaraarkii Maxkamadda

Maxkamadda Dastuuriga ah ee JSL:-

1. Waxa ay aqbashaday arjiga ku taariikhaysan 04/03/2024 ujeedadiisuna tahay dacwad dastuuri ah oo ku saabsan waafaqsanaan la'aanta Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023, Qod. 93aad, Faqraddisa 5aad.
2. Waxa ay laashay Faqradaha 5aad iyo 6aad ee Qodobka 93aad ee Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023 maadaama ay labadaa Faqradood si cad uga hor imanayaan Qodobada 8ad, 9aad, 22aad ee Dastuurka JSL, waxaana ka go'aan gaadhista arrimaha doorashooyinka loo raacayaa Qodobada 12aad, Faqraddiisa 2aad, iyo 17aad, Faqraddiisa 16aad ee Wax-ka-bedelka iyo Kaabista Xeerka Guud ee Doorashooyinka iyo Diiwaan-gelinta Codbixiyeyaasha, Xeer Lr. 91/2023.
3. Qaraarkani waxa uu soo baxay maanta oo ay taariikhdu tahay 07/03/2024.

Guddida Garsoorka:

- 1) Aadam X. Cali Axmed.....(Gudoomiye) _____
- 2) Maxamed Cumar Geele.....(Xubin) _____
- 3) C/qaadir Axmed Maxamuud.....(Xubin) _____
- 4) Maxamed Faarax Siciid.....(Xubin) _____
- 5) Axmed Diiriye Qaalib.....(Xubin) _____
- 6) Cali-shucayb Sh. Ibraahim Nuur.....(Xubin) _____
- 7) C/raxmaan Xuseen Caynaan.....(Xubin) _____
- 8) Yaxye Cali idiris.....(Xubin) _____
- 9) Cabdillaahi Cabdi Aadan.....(Xubin) _____
- 10) C/raxmaan Xasan Nuur.....(Xubin) _____

Sahra Ismaaciil Cabdillaahi.....Kaaliyaha Sare ee Maxkamadda Sare ee Dastuurka
JSL _____